

# 1 Pita

## Pitakafo mono wenena minagu-minagu ya lufuwa kana apito wi fulo gedami ka **Komu Ka**

Saimoni Pitakafo Yesu mono wenenala eba negu-negu upatoti wamo wenena ya lufuwa kana apito wi fulo gedami ka ama ya ne. Wi fulo gedami kamenalo ya gamani wenena ido inanimo wenenani mono kolámamo wenena yate mono wenenawa kaila nosa naba ámami fi gedanako, keina naba-naba folato, ya Pitakafo mono auma wi gedenae, loto lufuwa ama wi fulo gedami ne.

### *Lo oloto melami ka*

<sup>1</sup> Aiyo, linate Gotikafo iyaina o gedami wenena upatoti uti eba kuliya Pontusi, Galesia, Kapadosia, Esia, Bitinia, yaleka eba muki yau wau wenena yaidana oti minamo wenena ya namo Pita, Yesu Kilisto aposolola ya lufuwa ama wi fulo gedowe. Eyalo.

<sup>2</sup> Metefo Gotikafo komu adeinati geye fuli loto iyaina o gedami, ya Yesu Kilisto wanula yakafafo itili o gedenaiye, loto, ido Ounakafo olu felegaga o gedageto ya golodenawae, loto iyaina o gedami ne.

Nasafili mona ido you amene mona ya linate-doka mino faito gedenaiye.

*Mino kolinumo eba kiyabate nemo ka*

<sup>3</sup> Wekolate Yesu Kilisto Melafo Gotila kuliya oluto idokele. Amokafo siya-mulunau naba-naba kolito ya kiyabane enawamo monatina oudi-lutikatigu ya kofa-kofa o minenaiye, loto olu kofawa o ledami, ya Yesu Kilisto folaiguti olu nedi edami yakafo eti o ledami ne. <sup>4</sup> Eti oto, kosinauka ubale olu yawa fi ledami, ya fitala kiyámenami, ido fuma wiyámenami, ido lila melámenami, moda aimola ana lufuwa ya linate kiyabatina melami, <sup>5</sup> ya koli kikito umu minamo yamu ya Goti aumalakafo kiyaba o gedemo uto uto moda kamena nabalo ya olu omudi kami mona u oloto pi fuli lenagoliye.

<sup>6</sup> Aya yamu ya linate seti-muludigu lalo koliti alikani naba-naba o minafa, ido oiya amaleka kamena lina efemako neta-mata mona-mona yakafo kepa mele gimaigu yau keina koli minae. <sup>7</sup> Eti o minamo yakafo koli kikitina ya kepa mele umu-umu iye. Ya koli minafe? Kifana goli ya moda fuli lenami neta nefa, ido monala yoku ya kepa mele edamo ne. Ido koli kikitina ya kifana goli olu fulo edeto lalo lema neta ona nemoma nenako, yamu keina koli gimami netawa yakafo yo yaidana oto kepa mele umaigu yau kulawa oloto pi lalo ageto, ya Yesu Kilisto oloto pinaido ya gebotina, ido lamematina, ido kulitina naba moda olu oloto pi gedenagoliye.

<sup>8</sup> Amo ya omudikafo eyámafa, ido seti-muludi umu-umu o minae. Moda kolafe? Oiya ama ya eyámamo nefa, ido koli kikito umuti ya moda seti-muludigu lalo koliti alikani o-o amo monatina lamenala olu akaiya idaima nenako, loto egaidana oto lenune? Moda ogoufámone!

<sup>9</sup> Ido koli kikitina kulawa olu minama, ya olu omudi kaima nenako, loti alikaniwa naba-naba o-o amo ne.

<sup>10</sup> Ena polofete yate nasafili o gedennaiye, loti linate yamu adeinati lo oloto melamo we yate olu omude kami kawa mona kulawa ya auma witi moni wilimo idamo ne. <sup>11</sup> Aya we ya Kilisto ukana ogofu kolinami ka, ido yaloti lamenala kuliya naba olunami ka ya Kilisto Ouna lunigu nemo yakafu u komu meletu lo oloto itaima ne. Eti lotu lo oloto itami, ya nena kamena yamu liye? Kamena yaidanafe, ido amaidanafe? loti loga-loga oti monawa moni wilimo idamo ne. <sup>12</sup> Eti loti monawa moni wilimo idado, ya aya netawa yamu lo oloto meleti mono lonowa olamo kulawa ya inanimonidoka minámaito, moda linatedoka oloto pinaiye, lotu lo oloto pi gimami ne. Ido oiya ama ya aya kawa kuwa lalo ya Ouna Felegaga kosinauti ilifaito lomami we welaloti ya wenena mate linate lo oloto pi gimama ne. Aya netawa yamu Goti enisolela yate mona kulawa ya koli apasenumolae, loti koli minae.

*Felegaga mona yako melalo, lotu iyaina o ledami ka*

<sup>13</sup> Yamu ya linate kati-manidi olu kikitoti lutioudi koti kiyaba o minoti, Yesu Kilisto oloto pinami kamenalo ya nasafili o gedenamei mona yamu kati kife loti kiyabala o minalo. <sup>14</sup> Welalo golodoti minamo nomilipa yaidana oti minalo. Komu ya kawa kolámamo kamenalo ya linanimo oudi-luti-kati kolamo monau minomo idamo yaidana oti oiya melámalo. <sup>15</sup> Luti fiyami we ya

felegaga nemo yamaidana oti linate yaki neta ma-  
ma enawamo ya felegaga mona yako meletiko  
minalo. <sup>16</sup> Moda kolafe?

Namo ya felegaga minoma nenako, yamu linate  
ya felegaga minalo,  
loto ka mono lufuwau (*Wkp 11:44-45, 19:2, 20:7*)  
ya nemo ne.

*Gotikafo meina naba meletu fa mona yauti efili  
ledami ka*

<sup>17</sup> Ena Gotikafo wenena iya meletu eika  
wiyámoto, wenena muki ya inanimu monanido  
ya lifima itibito efe lotoko gimami we ya Metefole,  
loti loumamo yamu ya oiya ama wau wenena  
yaidana oti mikaleka minado ya koliya koliti  
monatina melalo. <sup>18-19</sup> Moda kolafe? Komu ya  
fa mona, autige-motadokati olamo mona meleti  
minagu yauti meina fito efili gedaima, ya u  
kopa unami neta, kifana siluwafe, ido golife,  
yakafo meina fito efili gedámami ne. E'e, Kilisto  
wanula meinala naba-naba yakafo meina fito  
efili gedaima ne, loti koli minae. Ya we ya sipisipi  
momola ukanalo nosámami neta ma minámoto,  
mo ona limo sipisipi yaidana oto ne. <sup>20</sup> Adeina  
akaima mika kosina olu oloto piyámaidokati ya  
moda metoli edaima nefa, ido oiya ama kamena  
alili melaido ya linatemu kolito moda olu oloto  
pi edami ne. <sup>21</sup> Ena linatemu kolami wenena  
linate ya Kilistodokati ya Goti koli kikito umamo  
minae. Moda kolafe? Aya we Goti yakafo amo  
folaignuti olu nedi edeto ya lamena kuliya naba  
umaima nenako, yamu koli kikitina, ido amomu  
koliti kiyaba o minamo monatina, ya Gotidoka  
ya ne.

*Goti wenenala muki ya sete-mulude gimi-gimi enumo ka*

<sup>22</sup> Ena ka ona kula meyalo melamo yamu ya oudi mo lito minanako, yamu mono wenenatina seti-muludi ona gimamo, ya moda luti-kati ona kula gimi-gimi amo mona ya moda aumafoko loti mele minalo. <sup>23</sup> Moda kolafe? Linate ya kofawa olu oloto pi gedaima, ya mikaleka fitala kinami ufa melado yati minámaiye. E'e, moda fitala kiyámenami ufa, Goti kala kofawa minowaminowa imo kaloti ya kofawa olu oloto pi gedaima ne. <sup>24</sup> Moda kolafe? Ka ama ya eti limo, Wenena muki mikaleka ukade ya yuwa yaidana oto ne. Ido kulite idami mona ya yuwa ugawa imo yaidana oto ne. Ena yuwa ya meguinaito, ugawa ya olumo wito fitala kiyaima nefa, <sup>25</sup> ido Goti kala ya minowaminowa oto nemo ne, loto ka mono lufuwau (*Ais 40:6-8*) ya nemo ne. Ido aya kala ya lo oloto pi gimamo kawa kuwa ya ne.

## 2

*Wekola ya kifana lagi kofawa minomo idami ka*

<sup>1</sup> Etito ya linate wenena koli nosámami o gedamo mona, koni wiyamo mona, suki mona, netaninamu koliti seti-muludi nosámami mele gimamo mona, kamani kiyamo mona, muki ya moda wakoti fulalo. <sup>2</sup> Wakoti fulo meleti, ya nomilipa namuna kofawa oloto piyamo yate aminamu kolamo yaidana oti linate amina ona kula oudi-luti-kati nenami yamu kolalo. Eti enawamo

yakafo olu omudi kami monatina u naba dinagoliye. <sup>3</sup> Moda kolafe? Wekola ya moda lalo ona kula minaiye, loti kolamo, ya aya aminamu kolutiko minalo.

<sup>4</sup> Ido amo ya kifana kofawa minowa-minowa imo yaidana oto minaifa, ido wenena mate eye fa netaidana ae. Eti afa, ido Gotikafo eye lalo neta ona kula ito, kiyaka oto numuna lagi yaidana oto fulo edami ne. Etito linate ya amodoka o fedeti, <sup>5</sup> moda ayaidana oti kifana kofawa minowa-minowa imo yaidana oti minamo, ya ika mau wito olu mene-mene o gedeto, Ouna numunala ku minaiye. Ido felegaga kuliyai numuna nabau yau yokila ki umamo yaidana oti linate oudi-lutikati umamo wenena felegaga ya netawa umamo ya Yesu Kilisto yamu kolito lalo eyaima ne. <sup>6</sup> Aya yamu ya eti limo,

Kolalo. Saiyoni numudo ya kifana lagi meinala naba-naba nemo ya ko lalo meleto oluto kiki loto fiyowe. Amo koli kikito umamo wenena ya moda ukanido kolámenagilae, loto ka mono lufuwau (*Ais 28:16*) ya nemo ne. <sup>7</sup> Yamu ya linate koli kikitamo wenena ya moda eye lalo ona itafa, ido koli kiki ádamo wenena yamu ya eti limo,

Kifana ya numuna kuwamo wenena eye fa netaidana itamo nefa, ido aya kifanawa yama moda numuna lagi kola fiyami ne, loto ka mono lufuwau (*Sng 118:22*) ya nemo, <sup>8</sup> ido ka ma ya eti limo,

Uteba ginito olu kopa o gedename kifana ya ne,

loto ka mono lufuwau (*Ais 8:14*) ya nemo ne. Amo kala ya koliti meyalo melámamo yamu ya utebataeba wi minae. Ido eti enawae, loto adeina lo mele gedaima nenako, yamu moda eti o minae.

<sup>9</sup> Eti o minafa, ido linate ya iyaina o gedami wenenala, yokila ki umamo wenena kiyaba we wekudi wenenala, felegaga wenenala mau naba, aimola wenenala ona ya minae. Eti o minamo, ya sinidigu yauti luti fito olu aimola lamenala lalo neta omona biyane lamenalau o gedami we lonola lalo naba auma wito olami kawa kuwa lo oloto melenawae, loto eti o gedami ne. <sup>10</sup> Linate komu ya fa wenena yako minamoma nefa, ido oiya ama ya Goti wenenala ona kula ya minae. Ido komu ya mulunau kolami mona olámamoma nefa, ido oiya ama ya mulunau koli gimami mona ya moda olu minae.

### *Goti wenenala mona melenumo ka*

<sup>11</sup> Sene-mulune gimomo wenenane-motao, linate ya wau wenena yamaidana oti mikaleka ama ya kamena lina efemako minenagilae. Yamu namo ya kati oluto eti loto logimowe. Kolalo. Ukade lalo kolami mona ya oude lowa-fina fi umami mona nemo yamu ya fulitalo. <sup>12</sup> Aya mona ya fulititi, ailo feka wenena minagu yau monatina lalo yako melalo. Etiti moninawamo, ya amote nosámami wenena minae, loti kamadi kinawamo, ya linate lalo melamo monatina eyefe lanako, Goti amodoka o fedenami kamenalo ya kuliya olu faka lenawae, loti ya etiti moinalo.

<sup>13</sup> Linate Wekola yamu koliti, ya gamani ka lo mona-mona melado ya meyalo melalo. Moda

kolafe? Gamani kiyaba we wekudi ya kuliya dito nemo yamu welalo melalo. <sup>14</sup> Ido kafuwalo wenena mika negu-negu ya kiyaba o gedeti, mona nosámami melamo wenena lifima olu gimiti, ido efe limo mona melamo wenena ya gebonina lenawae, loto gamani lonodo gilifi melami, yamu lo melamo kanina yaki lakoina golodalo. <sup>15</sup> Eti enawamo, ya ka kolámamo wenena ka maninigu minámami ka lo-lo amo, ya linate mona lalo melenawamo yakafo ka kenebanido winagoliye, loto Gotikafo lalo kolami ne.

<sup>16</sup> Yamu linate ya neta makafo nela wi gedámaito, moda efiliti minamo yaidana oti moni minalo. Eti oti, ya nelalo minámamo monawa yakafo mona nosámami olu asa witi falukámoti moda Goti nelalalo wenenala yaidana oti ya minalo. <sup>17</sup> Wenena muki ya monatina efe lotiko mele gimalo. Goti wenenala muki ya seti-muludi gimalo. Goti koliya kolalo. Gamani kiyaba we wekudi ya monatina efe lotiko mele gimalo.

*Kilisto keina olu moufami yaidana oto olu mofunumo ka*

<sup>18</sup> Linate kouba-naba lono olamo wenena yate wenabatina kulini olu faka loti kiyanido ya minalo. Wenaba you loti minoti mona lalo mele giminawamo wenena yamuko ádowe. E'e, ka aumafofo loti nosámami mona mele giminawamo wenabatina yaki ayaidanako o gedalo. <sup>19</sup> Yamu kolalo. Linate lifimatina minámaido ya wenena kopa olu nosámami o gedatoma, ya linate Goti yamu koliti auma witi keinawa olu mofunawamo ya moda lalo geyenagoliye. <sup>20</sup> Moda kolafe?

Linate ya nosámami mona ma melatoma, ya itibiti kaila fi gedenawado ya faifa auma witi olu mofunawamo, ya egaidana oto kulitina dinami ne? E'e, etito minámaifa, ido mona lalo meleti moninawado ya olu kopa o gedatoma, ya auma witi keinawa olu mofunawamo ya moda Goti omunalo yaidana mona ya lalo neta ona ne.

<sup>21</sup> Yamu aya mona meyalo melenawae, loto luni fito iyaina o gedami ne. Kilisto aimola ya olu komu meletu eikawanelo ya nege melenawae, loto linatemu oto ogofu kolami yama monawa gilibami ne.

<sup>22</sup> Amo ya nosámami mona ma melámami ne. Ido welauti ya suki ka ma olu oloto piyámami ne, loto ka mono lufuwau (*Ais 53:9*) ya nemo ne. <sup>23</sup> Ido ka nosámami loumado ya amokafo ka ma nosámami itibito logimámami ne. Ido ukana ogofu kolaido ya lifima ka ma itibito logimámami ne. E'e, ka olufe lo ledami we analo ya kawa muki moda melami ne.

<sup>24</sup> Amo yakafo lamomu kolito yá yofolo folami, ya nosámami monate olu aimola ukanalo mofuto ya folaiye. Eti o ledami, ya nosámami monatina fulu umuti, ya omudi kofawa minoti, efe limo mona yako meleti minenawae, loto eti o ledami ne. Ido amo ofamo yamakafo linate ya moda olu faka lo gedami ne.

<sup>25</sup> Moda kolafe? Linate ya sipisipi yaidana oti moni fuisami ya minafa, ido oiya ama ya itibiti oudi koto kiyaba imo weloka ya ae.

### 3

#### *Olonibo wanibo kanina*

<sup>1-2</sup> Linate wenaipa ya ayaidana oti linanimo wadibo kafunigu ya minalo. Eti o minenawamo, ya wadibo maleka Goti kala koli fuliti moninawamo, ya linate olonibo ka ma ádoti, Goti kuliya olu faka loti monatina felegaga meleti moinamo mona ya eyefe lenawamo, yakafo Gotidoka ika o gedename ne, loti wadibo kafunigu ya minalo. <sup>3</sup> Ido ukadi atuwa ekeinalla, ya manidi yowala minawamofe, ido kifana golikafo olufe lamo neta egelenawamofe, ido ukadido owo lalo neta winawamo ya olu egelámalo. <sup>4</sup> E'e, ukadi lulau falukuto nemo ekeinalla ya oudi-luti you amene melenawamo mona, u kopa ámunami ekeina, Goti omunallo lalo ona nemo ekeina yama olu egelalo. <sup>5</sup> Moda kolafe? Felegaga wenaipa komu adeina minamo ya Goti yamu koliti kiyaba o edeti, aya ekeina olu egeleti wanibo kafunigu ya mino-mino ae. <sup>6</sup> Etito Salakafo ayaidana oto wenabane, loto Abalahamu loumuto welallo melami yaidana oti linate monatina efe lotiko meleti, neta ma koliya kolámoti, amo olulafo-mota ya minae.

<sup>7</sup> Ena linate wemomo yaki ayaidana oti kati ki efe loti koliti, olodiboki lakoina ekeleti minalo. Wenaipa ukani aumalla ya lumuto nemoma nenako, loti, ido linateki amoki lakoina olu kofawa o gedami nasafililla gimito mino ko-ko enawamo iya ku ledaima nenako, loti ya koti kiyaba lalo yako o gedallo. Eti oti ya Goti loumunawamo kanu ya neta makafo ku ledámenagoliye, loti eti o gedallo.

### *Wenena muki kanina*

<sup>8</sup> Ena kawa ama ya eti loto lo fuli lenae. Kolalo. Linate muki luti-kati lawoko meleti, muludigu koliti, mono wenenatina seti-muludi gimiti, wena muki milumanina koliti, linanimo ukadi-luti-kati oluti idámoti ya minalo. <sup>9</sup> Etiti minato ya ido mate mona nosámami mele gedenawamo, ya linate lifima itibiti mele gedámalo. Ido ka mesafa kiti logiminawamo, ya ka itibiti moila fi gimámalo. E'e, eti o gedenawamo ya linate itibiti Metefokafo olufe lo gedenaiye, loti koliti, ya mona lalo mele gedalo. Moda kolafe? Metefo Goti aimola ubalela ya olunune, loti aya mona meyalo melalo, loto iya ku gedaima ne. <sup>10</sup> Yamu ya ka ma eti limo,

Makafo mino kolinae, loto kolito ido kamena lalo eyenae, loto kolinanimu we ya monaka etito melo: Weka kuluma yakafo ka nosámami ma lotenae, loto ido weka atuwa yauti suki ka ma lotenae, loto weka koto kiyaba o. <sup>11</sup> Ido nosámami mona ya meka umuto mona lalo melo. Ido you amene mona olu oloto pinae, loto kaimo luka ido wenenaka luni olu you lo gedenanimu lonowa auma wito olo.

<sup>12</sup> Moda kolafe? Monanina efe limo wenena ya Wekola omuna yakafo koto kiyaba o gedeto ido ka loumamo ya moda kapepe o-o minaifa, ido mona nosámami melamo wena ya amo onobalalo melanako, yamu geyami nosámainako, ka itibiti olunawamo ne,

loto ka mono lufuwau (*Sng 34:12-16*) ya nemo ne.

*Keina olu mofuto mona lalo yako melenumo ka*

<sup>13</sup> Ena linate ya mona lalo yako melenuwe, loti auma witi koliti monimo unawamo, ya kemakafo olu kopa o gedenami ne? <sup>14</sup> Yaidana ma minámaifa, ido efe limo monatina yamu ka keina imo ma linatedoka o fedenami, ya moda lalo kolinawamo wenena ya minae. Moda kolafe? Kolini ya kolámalo. Ido muludi fou ádaneyo.

<sup>15</sup> E'e, seti-muludigu ya Felegaga we Wekolate ne, loti aumafofo loti kolalo, loto ka mono lufuwau (*Ais 8:12-13*) nemo ka ya Kilisto yamu auma witi kolalo. Wekola koli kikito umuti kiyaba o ede minamo mona yamu ya wenena mate loga-miga o gedenawamo, ya linate kokatoti monawa fokiti lo oloto pi giminuwe, loti kamena-kamena olu lele loti minalo.

<sup>16</sup> Ido lo oloto pi giminuwe, lenawamo ya sodoti you amene mona meleti Goti koliya koliti logimalo. Eti enawamo yamu mate kamadi kinawamo ya Kilisto lulau mino edeti monatina lalo mele-mele o minado ya itibiti ka nosámami lo gedamo wenenawa ukanido kolinagilae, loti lutikati olu lamena oti minoti, kawa monawa lo oloto pi gimalo. <sup>17</sup> Moda kolafe? Lamo ya nosámami mona melogetoma ya itibito keina kolinumo ya moda lalo nefa, ido Goti ya lalo kolito lenami ya mona lalo melonido ya itibito keina kolinumo, ya moda lalo neta ona kula dito nemo ne.

*Kilisto ya Gotidoka gilimito unae, loto fulutoto neidami ka*

<sup>18</sup> Etito Kilisto aimola ya efe limo we yakafu lamo efe ádonimo wenena yamu kolito nosámami

monatemu kamena lawoko folami, ya linate Gotidoka gilimito unae, loto folami ne. Amo ukanau ofato folamima nefa, ido ounakafo olu kofawa o edami ne. <sup>19</sup> Ido aya ounawa yakafo uto ouni nelalo minado ya ka lo oloto gimami ne. <sup>20</sup> Ya wenena koliti kolámoti o minamo, ya komu adeina Nowa kamenalalo, nolo unami numuna sipi yaidana oto ku minami kamenalo, ya Gotikafo kamena-kamena koito gedeto kiyaba omo idaito, ya wenena kefo efema eiti (8) yaidanako sipiku idato, no lafa naba-naba oto wenena muki ginito, aya wenena yako olu omuni kami ne.

<sup>21</sup> Ido aya netawa ya moda mono noku wiyonimo yakafo lalimo olu omude kaiye, loto mebe-maba iye. Aya nokafo ya ukade fuma ya olu fulitamile, loto ádowe. E'e, Yesu Kilisto folaiguti neidami yakafo Goti onobalalo lute-kate olu lamena o ledó, loto lula fiyonimole, loto lowe. <sup>22</sup> Ya we ya kosinau dito Goti ana onaleka minaito, ya enisole, ido wenabanina, ido aumani nemo wenena muki ya amo kiyanaló ya minae.

## 4

### *Mono kolámamo wenena monanina fulitenumo ka*

<sup>1-2</sup> Etito Kilisto ukana ogofu kolami yamu linate yaki ayaidana oti kati kinawamo yakafo kiyalawe yaidana oto auma wi gedageto minalo. Moda kolafe? Ukana ogofu kolami we yakafo mikaleka faifa minenami kamenalo ya wenena ukani lalo kolami monalo meyalo melámoto, moda Goti lalo kolami monalo ya meyalo melemo

dinae, loto nosámami mona ya moda olu fultami ne.

<sup>3</sup> Aya yamu kolalo. Ailo feka wenena lalo kolumo monanina ya kopa-napa olu onamo mona, ukani-luni-kani lalo kolami mona, no noti kani-manini olu kopaitamo mona, alikani amo kamenalo ya weni-neta ido ekefa imo no ya kopa ilulu kuti no-no amo mona, suki goti kibelusa lo fuko ledami neta-mata kopa kouba-naba o edamo mona, muki ya linate komu melemo wamo kamena ya moda fuli lotaiye, loti kolalo.

<sup>4</sup> Etito linate oiya ama ya amoki lakoina uti kopa-napa monawa ilulu kuti melámamo yamu ya wenenawa yate kani ligi-ligi kiti kamadi kiki o minae. <sup>5</sup> Eti o minafa, ido monawa melamo monanina ya moda Goti onobalalo fokiti monawa loununagilae. Amo ya ka olufe-fe limo we naba ya nenako, wenena muki, kofawa minamo ido folamo yaki, muki ya mona melonimo ka moda olufe-fe lo ledenagolo moda kala ki minaiye.

<sup>6</sup> Aya yamu ya kawa kuwa lalo ya folamo wenena yaki lo oloto gimaima ne. Eti o gedami ya wenena muki mikaleka ukani monala melamo yamu ya lifima ka olufe-fe lo ledami yaidana oto amoki ya eti o gedenae, loto ido Goti kofawa nemo yamaidana oti ya ouni kofawa minenawae, loto kawa kuwa lo oloto gimaima ne.

*Kamena alitimo yamu nasafilila lomaido ya lonola lalo olunumo ka*

<sup>7</sup> Ena neta-mata muki ya moda onowa meleto fuli lenami kamena ya alili melaiye. Yamu linate kati ki efe loti minoti ya auma witi Goti loununuwe, loti ukadi-luti-kati koti kiyaba o

minalo. <sup>8</sup> Sete-mulude gimonimo mona yakafonósámami mona muki ya olu fito minaiye. Eti imo yamu u komu melenawamo mona ona ya auma witi seti-muludi ya gimi-gimi otiko minalo. <sup>9</sup> Mono wenena wenega enawamo ya eleka fiyámoti moda kiyaba lalo o gedalo.

<sup>10</sup> Linate ailo-ailo muki ya Goti nasafilila ailo-ailo yauti mono lono olunawamo auma iya mele gimami, ya aya nasafilila yakafolu auma wi ledageto, mono lonola olunumo ya koto kiyaba lalo lema enune, loti aya mono aumawa gimami yakafu mono wenenatina ani olu faka lo gedalo.

<sup>11</sup> Moda kolafe? Linate ka mono lo oloto melenawamo wenena ya Goti kala ona lema yako lo oloto melalo. Ido wenena ani olu faka lenawamo wenena ya Goti aumala gimaido yaloko mono lonowa olalo. Eti oti ya neta-mata o-o amo yakafu Yesu Kilistodokati Goti kuliya olu faka lenaiye, loti eti alo. Amo kuliya naba ido aumala moda minowa-minowa oto minenaiye. Ona.

### *Kilisto keina kolami yaki lakoina kolinumo ka*

<sup>12</sup> Sene-mulune gimomo wenenane-motao, linatedoka ka naba-naba o fedeto kepa mele giminae, loto aigu yau kati ligi-ligi kiti neta ailo ona ma fede lomaiye, loti kolámalo. <sup>13</sup> E'e, Kilisto yaki keinala lakoina olu mofu minone, loti lalo yako kolalo. Eti loti koliti ya amo lamenala oloto pinaido ayalo yaki ya lakoina seti-muludi lalo ona koliti alikani naba-naba enagolone, loti eti alo. <sup>14</sup> Linate Kilisto kuliya yamu ka nosámami lo gedatoma, ya Goti Ouna lamena

imoma mino gedaima nenako, yamu moda lalo koliti minenagilae.

<sup>15</sup> Ido linate minagu yauti mate wenena gini folamofe, ido ugele olamofe, ido wenena ma keinanina lodobe fiyamofe, ido nosámami mona ma melenawamo ya aya mona yamu lifima keinawa itibito olutenuwe, loti inanimó monatina koti kiyaba alo. <sup>16</sup> Ido Kilistodoka ekeleti minamo yamu keina mona mele gedatoma, ya ukanido kolámalo. E'e, amo kuliya olu kiki loti minado ya Goti ebola olu faka lalo.

<sup>17</sup> Yamu kolalo. Gotikafo ka muki monawa opolinami lonola ya aimola wenenaladoka apito olami kamena moda otaiye. Etito lalimo ya kawa komu apito lomaima nenako, yamu uto kala kuwa lalo koliti kolámoti o minamo wenena ya moda nena ka olu gimito onowa mele gedenami ne? <sup>18</sup> Etito,

Monanina efe limo wenena olu omuni kami kanudo ya keina koliti aefa fiti moinamo yama nenako, yamu Goti meni umamo wenena, ido nosámami mona mele-mele amo wenena, ya nedi-nedi enawamo ne?

loto ka mono lufuwau (*Snd 11:31*) ya nemo ne.

<sup>19</sup> Yamu Goti lalo kolito lido ya keina naba kolamo wenena linate yaki monatina lalo yako meleti ido oudi mele Goti analo yalo iti moinalo. Amo la-woke neta-mata muki olu oloto piyami we yakafó kamena-kamena kiyaba lalo yako o lede-lede o minaiye.

## 5

*Mono kiyaba wenena kanina*

<sup>1</sup> Etito ya kiliyatigu yau mono kiyaba we linate ya namo koinatibo kiyaba we minoto, ido Kilisto keinala naba kolami ya eyeto kawa kuwa lo oloto mele-mele omo uto, ido lamenala oloto pinami yaki lakoina olomo we yakafo kati oluto eti loto logimowe. Kolalo. <sup>2</sup> Goti wenenala ya linate mono kiyaba we adigu melami ya aimola sipisipila yaidana oti minamo yama nenako, loti koti efe loti kiyaba o gedalo. Etiti kiyaba o gedato ya nela lono olamoidana oti olámalo. E'e, moda Goti onobalalo seti-muludi lalo meletiko olalo. Ido kifana-koukame ko nenumolae, loti fa netamu koliti lonowa olámalo. E'e, moda aya lonowa yamu muludi idageto olalo. <sup>3</sup> Ido kiyaba we naba buluti ya wenenawa adigu melami wenena ya olu afima o gedámalo. E'e, moda sipisipi mau naba yaidana oti minamo ya lege alo, loti kanuwa gilibalo. <sup>4</sup> Eti o minato, ya sipisipi kiyabani we Wekola oloto pito enami kamenalo, ya moda kafa-nafa lagu yauti ma u komu uti neta olamo yaidana oto kokamu atenido moufamo ne-taidana, kosinauti lamena imo fitala kiyámenami ekeina ya olunagilae.

*Ukade oto lumuto kate kife loto auma wito minenumo ka*

<sup>5</sup> Ido ayaidana oti linate we kofawe ya gedamo wenena ka lenawamo ya kolife loti koliti, wenido meyalo melalo.

Ido linate muki ya linanimo ukadi ya oluti lumuti, ido wenenatina kulini ido ani olu faka lenawamo mona ya ukanido owo yaidana oto olu wiyalo. Aya yamu ya kolalo.

Wenena mate inanimo ukani-luni-kani oluti idamo, ya Gotikafo fina fi ginito, ido mate inanimo ukani-lunikani oluti lomamo ya nasafili o gedami ne,

loto ka mono lufuwau (*Snd 3:34*) ya nemo ne.

<sup>6</sup> Yamu linate ya Goti ana gedimo feumau yau linanimo ukadi-luti-kati oluti lumuti minalo. Ya aimola kamenala melaido ya moda olu faka lo ledenami ne, loti. <sup>7</sup> Amo ya lamomu kolaima nenako, loti keina kolamo ka muki ya amodoka fulo umalo.

<sup>8</sup> Kati kife loti ukadi-luti-kati koti kiyaba o minalo. Kuwotibo kamadi ki-ki imo we Satani ya kula-laiyoni wela atoto ka naba limo yaidana oto monito, yalekati ofo nenafe? amalekati ofo nenafe? loto u ya fede ama fede oto moni wili minaiye. <sup>9</sup> Ena mono wenenatina mikau-mikau ya keinawa ayaidanako oloto pi gede fulitami ne, loti koli minanako, yamu koli kikitina auma witi nedi minoti, fina fi umalo.

<sup>10</sup> Ido linate ya keinawa kamena lina efema ya kolato, ya Goti, nasafili mona-mona aboga, ya Kilisto lulau mino edeti aimola minowaminowa oto minami lamenalaleka enawae, loto luti fiyami we yakafo kofa olufe-fe lo gedeto, lituma fi gedeto, olu auma wi kikito gedenagoliye. <sup>11</sup> Amo aumala naba-naba mino edamima ya moda minomo dito minowa-minowa oto nemo ne. Ona.

### *Onowaleka ka*

<sup>12</sup> Ena Sailasi anakafu ya ka ama lina efe ya lufuwa wi fulo gedowe. Amo ya mono wenenate ka ona kula kanuwalo efe loto moni-moni o minami we ne, loto koli umowe.

Ena nasafili lulau minagu ya Goti nasafilila ona kula nemoma nenako, loti ayau moda auma witi nedi minalo, loto kati oluto olu auma wi gedomo ka ya lufuwa amau ya lo oloto mele gimowe.

<sup>13</sup> Linateki lakoina iyaina o gedami wenena Babiloni numudo monolo mau wi-wi amo yate linatemu koliti aiyo-koiyo ka ya fulo gede minae. Ido mono nanefo Maki yaki ayaidana oto fulo gedaiye.

<sup>14</sup> Ena linate mono wenenatina geyeti aiyokoiyo ka logimiti ya seti-muludi gimamo mona ya gilibinune, loti abusa wi gedalo.

Linate muki Kilisto lulau mino edamo ya you amene mona mino gedenaiye. Modae.

**Gotiki olu kutifi ledami ka kofawa**  
**The New Testament in the Komongu dialect of the**  
**Siane Language of Papua New Guinea**  
**Nupela Testamen long tokples Siane long Niugini**

copyright © 1991 Wycliffe Bible Translators, Inc.

Language: Siane

Dialect: Komongu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 22 Feb 2024 from source files dated 31 Aug 2023

16002536-bc8f-5779-8e88-c1fed5ba4079